

CORO BREGAGLIA 1972 >



Stimaa present, er da parte mia ev dun la buna seira e grazie da esar chilò in semal e nualtar. Da ün par d'agn ie nu sun pü ün membro attivo, ma i man dicc ca ie sun ün archivi vivente e da quinter sü ün po da la storia dal Coro. In ciò in cusa ca save al Coro al festegia i se prüm 60 agn da vita, ma, al me riassunto al partisc ün po plü tard. Le l'atonn 1972 e al scumenza la növa stagiun.

Dirigent al maestar Remo Maurizio e lan prova sa lan fa ent la palestra da Visavran. Presente er ün da 16 agn ün po ribelle cun cavei lung e baffi (em guarder in ciò as ges mia) e con diversi chili in meno. Al me look magliun calurà cun sul davant la pubblicità da lan università in America in cusa ca l'era da moda in quei agn, stivalett da pel tracent obbligatoriamente sur lan calcia, cun du belan curegian rossa. Al sarà forsi giü par quel ca al maestar Remo al ma mess dalunga in segunda fila.

Dopo tre prova, ie a dicc e me bap, ca ie ma la sentiva mia di gnir e cānter cun tücc qui veil. A parte ün pair gli altar ieran tücc ent i agn di "anta". Al maestar Remo ca l'era er al me gudaz, le gni e saveir da la mi intenziun e al ma proposit al seguente ca ie a pö acetaa. Franco tü canta tütt la stagiun 1972/73 e sa dopo propri at plesc mia, tü po lascier al Coro. La si idea, l'era ca ie rivess e trer dree altar giuan. Al scopo le rüsci in pieno, parcie ie a partecipaa attivamente per 48 agn. Ma an torna in dre e la stagiun 72/73. Plan planet es trover la seira cun i "veil" l'era pö mia gner in sci mäl e ie sun prest ben integra ent al Coro. Avril 1973, uscita e Bevi e l'Hotel Torriani, cena cun cuncert e ball.

E saveir prüma certi particolari as ves facc mear e fär al cuncert e dopo la cena. Dürant la cena ün aviss important: la posta la partisc e mezanöcc e guardee da essar tüci pront. Ai era ci ca baleva, ci ca la quinteva sü cun qui da Bevi, ci cal vea sempar seit e da qui ca cambievan ustaria.

Plan planin le cia mezanöcc, ma al manca diversi cantarin. Am radegia ent al ristorante fin vers l'üna da nöcc e pö i presenti ien indacc en la posta e spacier (quela seira ie sun giü ün di brav), intant ün grüp le indac e la ricerca da qui ca mancäva. Vers lan dua al riva qui ca ieran partì par prüm, ma issa an savea mia in dua ca seran incantuna i "ricercatori". Fatto sta ca tra ci ca riveva e ci ca indea, la posta la lascià Bevi in torn e lan 4 da la duman. Quista le giüda la mi prüma festa cun al Coro.

E la fin da la stagiun par motiv personali al Remo al lascia al Coro e el se post al subentra al Mario, al Mariolin in cusa ca mal clama nualtar. Lan stagiun dal Coro as susseguan senza tanci problemi.

Al Coro as se raforzà con diversi giuan e in quisti agni a sa partecipa e lan diversa festa da cant dal Grisciun, facc cuncert sù lan piazza dai pais da la val e quisto in semal e la Musica Badile e partecipa e altar event. 25 giügn 1977 cuncert cun al Coro Frohsinn da St. Moritz el Laudinella. La sereda, dopo al cuncert le cuntinueda cun tombola, lotteria ecc. ecc. Ün membro dal Coro in quisti giöc al veiva vinciü una butiglia da grappa e su la Posta le gni or la proposta da la fer girär tra da nualta in tant ca am turneva e ciäsa. Ma al proprietari an voleva propi mia saveir e la tegni la si butiglia ben strecia tanco sa al ve cia ün popin.



E Visavran en la plaza, la Posta la se ferma, e lascier ora qui dal löcc. Er al canterin cun la butiglia l'era ün da qui, e cun gnir or da la Posta al se mez inscampücia e la grappa le sciüneda sul stredun e la butiglia in tanci tocc. Pazzia ma tutto sommato le forsa giü mear inscia.

Gia ent la prümaveira dal 1980 as scumenza e ciancer da divisa. Ün cantarin in quista ucasiun al minacia da gnir or dal Coro sa as ves facc quisto pass. Finalmente el cuncert da la Primexpo e Lugano al 18 avril 1982 al Coro Virile Bregaglia as presenta cun un pullover uniforme calur ross vin. Pürtrop quel membro la

mantegni la si parola e la lascià al Coro.

Dürant l'assemblea dal 25 novembar 1983 l'attuario al scriveva al seguente:
Si decide all'unanimità di organizzare di nuovo un viaggio a Verdabbio in Mesolcina. Questa volta però si decide di effettuare il concertino anziché al "Gufo notte" in piazza a Verdabbio e prima della cena. PS: Il Gufo notte par ci ca al sa mia l'era un famoso locale notturno da la Mesolcina. No comment!

Grand unur ent la stagiun 84/85, al coro la dacc al benvenuto el president da la Cunfederaziun, l'onorevole Kurt Furgler durant la si visita in Bargaia. Al Coro giüdà er da altran urganizzaziun la pö organizza par al 2 da giügn dal 1985 la festa da cant da Distret e Visavran. Er sa ma giü un gran success cun bel temp e tanta gent, al tütt le sciüna giò cun quasi CHF 1'800.00 da perdita.

Fin e la fin di agn 80 al Coro al va in avant cun al se solit senza tanci sussulti e al participa e varian manifestaziun. Durant l'assemblea dal 20 novembar 1987 varün pensa e una bandiera e quista proposta la trova un bun riscontro e già par la festa dal 25° al vessillo l'e pront. Pürtrop al Mariolin dopo 15 agn da dirigent, ent la fin dal 1989 al lascia la Bargaia par torner e laurer in Mesolcina. As ringrazia al Mario par al grand laureri ca la fac e cun grangi applausi al vegn nomina membro onorario.

Al Comitato le mia stac ferm e già durant quell'assemblea al presenta al növ dirigent, ca al vegn sü da Clavena el vegn er nominaa, l'Alfredo Montemurro. L'Alfredo as presenta e cun pocan parola al quinta sü in cus ca lü l'intend guidär al Coro.

Cun l'Alfredo as canta mia doma ma s'imprend er e respirer ent al modo giüst, e imposter la vusc, marcher pü ben i plan e i fort ecc. ecc. Lan stagiun la passanora in ün boff. Altra novità, ent i cuncert as canta senza föi, mia in sci facil, par qui ca da decenni ian tegni ün föi sota al nes. Pürtropp cun quistan novità am pert qualci toc par streda ma vers l'inizi dai agn novanta al Coro as ritrova sempar anca cun passa 40 cantarin attiv.

La stagiun 1993/94 la presenta üna novità:
al Coro al decid da imprendar da lan canzun da Nadäl e e turno agn par agn am gira lan baselga da la Val e mas presenta parfin e la Messa da mezanöcc gio Clavena. Lan stagiun la diventan abastanza impegnativa parcie i cuncert i diventan semar da plü, sempar daplü manifestaziun in tüt al Cantun e er ora i volan la nosa presenza.

In quisti agn as fa fin 10 cuncert par stagiun e par tanci l'e diventà trop impegnativ e plan planin al nümer di membri attivi al cala. La fama l'e mia sempar doma positiva. L'Alfredo l'e mia tanco l'uomo del Monte che dice "si" (par ci ca sa mia l'uomo del Monte a fa la pubblicità sulla raccolta dell'ananas), l'Alfredo le cuntent ma parò al trova sempar anca vargot ca as podes migliorer.

Finalmente dopo tanc agn ent al Coro al 25-27 mac 1996 ie fac la prüma spasagiäda, am se indac e Firenze. Firenze l'e una cità meravigliusa e par avder tütt lan opera as ves da ster gio almeno üna satmana. Ie a v'cuint sü doma doi episodi ca par ie ien giü ün po particolari. La seira cena in üt tipic locale dal löc, menü: la famosa bistecca alla fiorentina, vargot da ünic, ca ie a mai plü manga e ca ie v'la present in quisto modo:

La bistecca alla fiorentina si ottiene dal taglio della lombata di vitellone o scottana (La scottana è una femmina di bovino che non ha ancora partorito tra i 15 e 22 mesi): ha nel mezzo l'osso a forma di "T", con il filetto da una parte e il controfiletto dall'altra.

La carne deve essere "frollata" per un adeguato periodo di tempo. La Fiorentina deve essere a temperatura ambiente prima di essere grigliata e assolutamente deve essere cotta senza condimento o marinatura.

In linea generale, la bistecca fiorentina dovrebbe essere spessa circa 5 cm e pesare da 1,0 fin 2,0kg.

Varün al magari ciapa fam? Sci al po inder e Firenze e l'ha prover. Ie crec ca la vegn sempar anca cuscineda!!

La dumenga duman in Piazza Signoria an se mes dree e canter, ma facc ün veri e propi concert mia programmà.

Dalunga ün grand nümer da gent as se formeda e torn el nos Coro e dopo 10 o 15 canzun ma pö dic ca l'era sciüna. Grangi applausi e as sentiva la gent ca la discevan tra da lür:

Cantano molto molto bene e l'altro, e si ormai è risaputo che gli italiani son bravi canterini.

In quel mument 4 o 5 da nualtar ma töcc ora la carta d'identità e anse indac e la muser. La gent le resteda surpresa e la doma dicc:

Però anche voi cantate bene.

E l'inizi da giügn 2001 altra gita dal Coro e quista volta e Cortina. Bela cittadina circondäda da lan Dolomiti con le tre Cime di Lavaredo famusan in tütt al mond. Er chilo ün pit episodi. La seira an sera e cena, parò mia plü e Cortina, in ün ristorante in du ca i festeggevan er üna nozza.

Spontaneamente ma facc ün pit concert in unur di spus, con granda sorpesa dai spus stess e da tüt la comitiva. Gli invitati i an pensa ca l'era stacc organizza dai spus e i spus e viceversa. Tanco premi ma pö podü beivar e speisa dai nozzarin.

Pürtrop l'agonia dal Coro la cuntinua e ogni agn al pert ün quai tocc. Ent l'assemblea dal 2 da novembar 2006, e l'e la prüma volta ca al Coro al decid das fermer par üna stagiun e rifletar cosa fer.

An riva e l'assemblea dal 21 novembar 2008 e al president l'informa ca altar 5 membri i'an lascia al Coro. Anca quella seira as cerca da lan soluziun, as stüdia cosa fer, as discüt in lung e in larg, cuntinuer ev. cun doma tre vusc o lascer croder al Coro? Rodolfo (al nos Rudi) al propon da mantegnir listes al grüp e cuntinuär e canter. Quista proposta la vegn acetada da 14 membri.

Al nümer di membri el mument l'e talmente bass ca al president e al cascier ian decis da lascer al Coro. Quisto pass al vegn pö, plü tard segui er dal dirigent.

Al Rodolfo (Rudi) già quella seira al vegn nominaa president e i 14 irriducibili i decidan da continuer al viagg.

Il Coro chiama e Mariolin risponde. Mario ca al veva già dirigiü al Coro par vari agn le pront es tragheter era quista volta verso acque più limpide. Al fa parò presente ca al se aiüt l'e transitori e ca al comitato la pö da trover ün altra soluziun.



Concerto a Roveredo. Foto dalla "Rivisita Mesolcina e Calanca.

En l'aton dal 2009 al scumenza l'era da ün dirigent dona, la Nadia. Strano ma vero al nümer di cantar in al torna e crescer fin e river sui 30 membri attivi. In quista ucasciun ie poss doma ringrazier la Nadia par al se impegn, mia parcie le stacia la plü brava o parcie le üna dona, ma parcie ogni vendardi e pö d'invern, la gnia sü da l'Appenzello e posta per dirigiar al Coro. L'e ün grand sacrifici e sai völ üna granda volonta. Grazie Nadia.

Al Coro l'e torna e essar quel ca l'era prüma da la crisi e al partecipa e lan varia manifestaziun. Ün

impegn abastanza grand a ma la giü durant la stagiun 2014/15 par l'incisiun dal prüm CD e par la festa dal 50esim. le a par doveir da cronaca da rigorder ca d'urant al 1971 al Coro al veiva incis un disco cun canzu in bargaiot.

Ma pö er decis da cambier al nom in CORO BREGAGLIA. La Nadia la portà al Coro in avant senza grangi problemi, er sa ma giü da cumbatar per trover ün növ president.

Pürtrop ent la prümaveira dal 2020 as ferma tüt, quasi in tüt al mond. Le rivaa al “Covid” e an se stac e ciäsa par lung temp. Durant quista pausa forzada, par motivi personali, ie ha dacc lan dimissiun e sun gni ora dal Coro e par quist motiv la mi storia la sciüna chilò.

Ie auguri ei membri dal Coro e el növ dirigent tanta sudisfaziun, ver sempar plasceir da cantär e lunga vita el Coro Bregaglia.

Ie’v ringrazi par l’atenziun e auguri anca e tücc üna bela festa.

GRAZIA